

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U TEŠNJU
Broj: 39 0 K 071883 25 K
Tešanj, 23.03.2026. godine

U IME FEDERACIJE BIH!

Općinski sud u Tešnju, po sudiji Besimi Ajanović, uz učešće zapisničara Hadžan Ninela, u krivičnom predmetu protiv optužene M. A. kći S., nastanjena na adresi V. broj ..., općina Tešanj, zbog krivičnog djela „Ucjena“ iz člana 296. stav 1. KZ FBiH, po optužnici Kantonalnog tužilaštva ZE-DO kantona broj T04 0 KT ... 24 od 12.02.2025.godine, nakon održanog glavnog i javnog pretresa dana 03.03.2026.godine u prisutnosti Kantonalnog tužioca Amra Ahmetlić i optužene M. A. lično, donio je i javno objavio u prisustvu KT Zenica i optužene, dana 03.03.2026.godine, sljedeću:

P R E S U D U

OPTUŽENA: M. A., kći S. i majke H. rođene M., rođen godine u Doboju, stalno nastanjena u mjestu V. broj ..., općina Tešanj, završena SSS, po zanimanju frizerka, nezaposlena, udata, majka petoro djece, srednjeg imovnog stanja, Bošnjakinja, državljanka BiH, JMB: ..., neosuđivana,

K R I V A J E

Što je:

u vremenskom periodu od 13.05.2023. do 19.05.2023. godine, u Tešnju, s ciljem pribavljanja protivpravne imovinske koristi, prijetila K. A. iz J., općina Tešanj, da će drugim osobama otkriti kako je s njim imala seksualne odnose ukoliko joj ne isplati novac, budući da je posjedovala njegove fotografije na kojima je obnažen do pojasa i nagovijestila da će te fotografije objaviti na lokalnim portalima, iako je bila svjesna da će tim postupcima naškoditi časti i ugledu oštećenog, čime ga ja prinudila da joj dana 13.05.2023. godine isplati iznos od 100,00 KM, a zatim isti dan iznos od 1.500,00 KM, da bi joj 19.05.2023. godine isplatio novčani iznos od 500,00 KM, nakon čega su sporne fotografije objavljene na portalu „novinar.ba“ i „RIS- region“, čime je K. A. oštećen za novčani iznos od 2.100,00KM,

dakle, s ciljem da sebi pribavi protivpravnu imovinsku korist zaprijetila i otkrila nešto što škodi ugledu drugome,

čime je učinila krivično djelo „Ucjena“ iz člana 296. stav 1. KZ F BiH, pa joj se na osnovu istih Zakonskih odredaba i uz primjenu od člana 49. i člana 62. KZ FBiH izriče

UVJETNA OSUDA

Kojom se optuženoj M. A. kći S., nastanjena na adresi V. broj ..., općina Tešanj, za počinjeno krivično djelo, utvrđuje kazna zatvora u trajanju od 6 (šest) mjeseci i

istovremeno određuje da se ista neće izvršiti ukoliko optuženi u roku od 1 (jedne) godine ne učini novo krivično djelo, a računajući od dana pravosnažnosti presude.

Obavezuje se optužena da na ime troškova krivičnog postupka-paušala plati iznos od od 50,00 KM u roku od 30 dana od dana pravosnažnosti presude.

Na osnovu odredaba člana 212. stav 3. ZKP FBiH optužena se obavezuje da na ime naknade štete oštećenom K. A. sina M. iz J. isplati iznos od 2.100,00 KM u roku od 30 dana od dana pravosnažnosti presude.

U pogledu nematerijalne štete oštećeni K. A. se sa imovinsko-pravnim zahtjevom upućuje na parnični postupak.

O b r a z l o ž e n j e

Kantonalno tužilaštvo ZE-DO Kantona Zenica optužnicom broj: T04 0 KT ... 24 od 12.02.2025.godine, optužilo je M. A. kći S., nastanjena na adresi V. broj ..., općina Tešanj, zbog krivičnog djela „Ucjena“ iz člana 296. stav 1. KZ FBiH, na način, vrijeme i mjesto kako je to opisano u dispozitivu navedene optužnice.

Sudija za prethodno saslušanje ovog suda je predmetnu optužnicu potvrdio dana 13.02.2025.godine i zakazao ročište radi izjašnjenja o krivnji.

Na ročištu koje je održano dana 12.03.2025. godine, optužena M. A. je porekla krivnju po navedenoj optužnici, te je spis proslijeđen postupajućem sudiji radi zakazivanja glavnog pretresa.

Na glavnom pretresu održanom dana 03.03.2026.godine Kantonalni tužilac je pročitao optužnicu te izjavio da u cijelosti ostaje kod svih prijedloga dokaza kako subjektivnih tako i dokaza objektivne prirode koji su navedeni u optužnici.

Optužena je u uvodnom izlaganju izjavila da je tačno da je počinila radnje opisane u optužnici, da priznaje krivnju i da je djelo počinjeno na način, mjesto i vrijeme kako je to opisano u činjeničnom opisu optužnice.

Priznanje optužene je potpuno i u skladu sa provedenim dokazima na glavnom pretresu odnosno dokazima koji su uloženi od strane Kantonalnog tužioca radi utvrđivanja da li postoji dovoljno dokaza o krivnji optužene a to su: Potvrda o privremenom oduzimanju predmeta PS Tešanj broj: ... od 19.05.2023. godine, na ime M. A., Zapisnik o izvršenoj radnji privremenog oduzimanja predmeta i popisu privremeno oduzetih predmeta PS Tešanj broj: ... od 19.05.2023. godine, Naredba Općinskog suda u Tešnju broj 39 0 K 071883 23 Kpp od 29.09.2023. godine, mZapisnik o otvaranju i pretresanju pokretnih stvari PS Tešanj broj: ... od 09.10.2023. godine, Odobrenje KT ZDK za podnošenje zahtjeva za pretresanje mobilnog telefona, Fotodokumentacija PS Tešanj broj: ... od 09.10.2023. godine, koja se odnosi na fotografisanje novčanica, Fotodokumentacija PS Tešanj broj: ... od 19.05.2023. godine, koja se odnosi na fotografisanje telefona i poruka H. A., Fotodokumentacija PS Tešanj broj: ... od 19.05.2023. godine, koja se odnosi na fotografisanje telefona i poruka K. A., Zapisnik saslušanju svjedoka-oštećenog K. A. PS Tešanj od 19.05.2023. godine i zapisnik o saslušanju svjedoka H. A. PS Tešanj od 19.05.2023. godine.

Uvjerenje suda da je do priznanja krivnje došlo s razumijevanjem, te da je optužena svjesna svih posljedica i obaveza koji proističu iz priznanja krivnje, te da postoji dovoljno dokaza o krivnji optužene, pa je sud i prihvatio priznanje krivnje optužene.

Iz naprijed navedenih dokaza a što je potvrđeno i priznanjem optuženog nesumnjivo proizilazi da je optužena M. A. u vremenskom periodu od 13.05.2023. do 19.05.2023. godine, u Tešnju, prijetila K. A. iz J., općina Tešanj, da će drugim osobama otkriti kako je s njim imala seksualne odnose ukoliko joj ne isplati novac, budući da je posjedovala njegove fotografije na kojima je obnažen do pojasa i nagovijestila da će te fotografije objaviti na lokalnim portalima, iako je bila svjesna da će tim postupcima naškoditi časti i ugledu oštećenog, čime ga ja prinudila da joj dana 13.05.2023. godine isplati iznos od 100,00 KM, a zatim isti dan iznos od 1.500,00 KM, da bi joj 19.05.2023. godine isplatio novčani iznos od 500,00 KM, nakon čega su sporne fotografije objavljene na portalu „novinar.ba“ i „R.- region“.

Prednje utvrđenje prije svega proizilazi iz iskaza svjedoka-oštećenog K. A. koji je dana 19.05.2023.godine saslušan u policijskoj stanici Tešanj. Iz iskaza ovog svjedoka vidljivo je da je isti prijavio optuženu M. A. da mu je prijetila da će drugim osobama otkriti kako je s njim imala seksualne odnose ukoliko joj ne isplati novac i nagovijestila objavu na lokalnim portalima kompromitirajućih fotografija koje je kod sebe posjedovala.

Iz iskaza ovog svjedoka također proizilazi da je optuženoj M. A. a u cilju da bi spriječio takvu objavu dana 13.05.2023.godine prvobitno isplatio iznos od 100,00 KM, te isti dan ponovno isplatio iznos od 1.500,00 KM, a zatim na njeno traženje isplatio joj i iznos od 500,00 KM dana 19.05.2023.godine i da je i pored toga došlo do objave spornih fotografija na portalu „n..b.“ i „R..r.“, što je on sve prijavio policijskoj stanici Tešanj.

Iskaz oštećenog u cjelosti je potvrđen iskazom svjedoka H. A. koji je svoj iskaz dao dana 19.05.2023.godine u PS Tešanj kao i sačinjenom Fotodokumentacijom putem fotografisanja telefona i poruka H. A. broj: ... od augusta 2023.godine, Fotodokumentacijom putem fotografisanja telefona poruka K. A. od augusta 2023.godine i Fotodokumentacijom putem fotografisanja novčanica broj: ... od marta 2024.godine, kao i ostalih provedenih materijalnih dokaza Kantonalnog tužilaštva.

Iz provedenih dokaza jasno proizilazi da je optužena s ciljem da sebi pribavi protivpravnu imovinsku korist zaprijetila oštećenom objavom kompromitirajućih fotografija na lokalnim portalima, a čijom objavom bi naškodila njegovom ugledu u sredini u kojoj živi i time ga prisilila da u cilju sprječavanja takve objave da joj isplati iznos od 2.100,00 KM, čime su se u ovakvim radnjama optužene stekla sva bitna obilježja krivičnog djela „Ucjena“ iz člana 296. stav 1. KZ F BiH, pa kako ne postoje okolnosti koje isključuju krivičnu odgovornost optužene i kako je optužena bila svjesna svog djela i htjela njegovo izvršenje, to je sud optuženu oglasio krivom i osudio kao u izreci ove presude.

Prilikom odlučivanja o vrsti i visini krivično pravne sankcije na strani optuženu sud je cijenio sve okolnosti koje su od uticaja za odmjeravanje kazne. Od olakšavajućih

okolnosti sud je našao da je optužena priznala izvršenje krivičnog djela i time doprinjela bržem okončanju krivičnog postupka, odnosno njegovoj ekonomičnosti i efikasnosti, da se kaje, njene lične i porodične prilike, da je nezaposlena, majka petoro djece, da nije do sad osuđivana što je sud utvrdio uvidom u Izvod iz kaznene evidencije za optuženu, otežavajućih okolnosti sud nije našao, pa je optuženoj izrekao uvjetnu osudu kojom je utvrdio kaznu zatvora u trajanju od 6 (šest) mjeseci i istovremeno odredio da se ona neće izvršiti ukoliko optužena u roku od 1 (jedne) godine dana od dana pravosnažnosti presude ne učini novo krivično djelo sa uvjerenjem da će se sa izrečenom kaznom zatvora u cijelosti postići svrha kažnjavanja, kako sa aspekta generalne, tako i sa aspekta specijalne prevencije.

U skladu sa odredbama člana 202. stav 1. ZKP FBiH, optužena se obavezuje da na ime troškova krivičnog postupka-paušala plati iznos od od 50,00 KM u roku od 30 dana od dana pravosnažnosti presude.

Na osnovu odredba člana 212. stav 3. ZKP FBiH optužena se obavezuje da na ime naknade štete oštećenom K.A. sina M. iz J. isplati iznos od 2.100,00 KM u roku od 30 dana od dana pravosnažnosti presude.

Uvidom u Zapisnik o saslušanju svjedoka K. A. broj: ... od 19.05.2023.godine, sud je utvrdio da oštećeni potražuje materijalnu štetu u visini od 2.100,00 KM, te nematerijalnu štetu koja mu je prouzrokovala a čiju visinu nije odredio prilikom davanja iskaza, pa s obzirom da je visina materijalne štete nesporna, to je sud obavezao optuženu da oštećenom nadoknadi materijalnu štetu u visini od 2.100,00 KM u roku od 30 dana od dana pravosnažnosti presude, a što se tiče nematerijalne štete sud je istog uputio na parnični postupak.

Na osnovu svega navedenog sud je odlučio kao u izreci ove presude.

PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana od dana prijema presude.

Sudija

Ajanović Besima